

«Litteratura» 30 – vida u alva?

DA RENZO CADUFF,
VILLARS-SUR-GLÂNE

Uss èsi cler per tuttas e tuts, er per las Rumantschas ed ils Rumantschs: «Novs talents» e novas ovras naschan da paginas vidas. Quai che mancava a noss auturs ed a nossas auturas vegnuss mess a disposiziun a moda generusa, er sche na dal tut gratuita, da l'Uniun per la litteratura rumantscha (ULR): «Paginas alvas», paginas vidas. Spazi per «scriver, dissegner u collar».

Er tar nus Rumantschs pudessan sa zuppar pitschnas Hertas e Flurins Müller. Damai ora cun forschs, colla e magazins da tuttas sorts ed en cun puzzles poetics, collaschas e cumbinaziuns fantasticas or da palpieri da gassetta en la Litteratura 30 che be spetga da vegnir emplenida. I va tut da sez, be guardai. Original è quai ch'è nov! U forse in «original»?

«Albur», «albezza» quai è il remedi per «novs talents» e per la litteratura rumantscha da l'avegnir. L'alv che stimulescha, hai jau patratgà. Ma na pudessi forse sa tractar d'ina imitaziun tardiva dal famus «cudesch alv»? E sche quai fiss il cas: Tge pomai duess vegnir destrui?

I pudess però er esser che l'alv Ispaventia plitost l'inspiraziun, hai jau patratgà vinavant. Po dar che abunentas ed abunents da la revista, la gronda

part scriventas e scrivents, piglian il spavent davant tut quest alv che vegn offri ad els da la ULR. Damai davent e furt cun la Litteratura, cedel da pajament e tut.

Putgà, perquai che gist «mandats da pajamaint» avessan pudì servir sco pli baud als giuvens poets rumantschs (poetessas na devi da lez temp uschè bleras) per sa deditgar a lur mastergn: «Vers epic sülla vart largia, vers lyric sülla vart cuorta» (Andri Peer).

Uss che la Litteratura è davent, turnain tar ses cumenzament, tar ils fegl scrits cun maschina da scriver e fermads a la simpla cun in bostitch, las Novas litteraras. Quellas paucas ch'èn ozendi avant maun èn in zic sblatgidas e lur agraffas da ruina, ma ellas èn anc adina interessantas e cunzunt na vidas. Ils «talents» eran quai ch'els eran ed èn anc oz. Per questa glossa vulesch quai dir: In bostitch per in fegl A4, quai che n'è forse betg uschè elegant.

I resta pia nagut auter che da trametter la glossa a nossa gassetta e forse ch'ina lectura, in lectur è uschè bainvulent e la taglia or, tatga en il numer vid, ed al trametta a la redaziun da la Litteratura. Pertge tar mai qua en Svizra franzosa è la Litteratura davent u per dir la vardad, na betg anc riva da. Sche l'«experiment» è stà insatge original mussa lura l'exposiziun als Dis da litteratura 2010 a Domat.